



**ENTI RREGULLATOR I ENERGJISË
BORDI**

VENDIM

Nr. 93, Datë 08.06.2020

“MBI

**KËRKESËN E SHOQËRISË FSHU SHA PËR RISHIKIMIN E VENDIMIT TË ERE NR.
73/2020, MBI MIRATIMIN E “KONTRATËS TIP PËR SHITBLERJEN E ENERGJISË
ELEKTRIKE NDËRMJET SHOQËRISË SË PRODHIMIT TË ENERGJISË ELEKTRIKE
AKSIONET E SË CILËS KONTROLLOHEN PLOTËSISHT OSE PJESËRISHT NGA SHTETI
DHE FURNIZUESIT TË SHËRBIMIT UNIVERSAL/FSHU PËR FURNIZIMIN E
KLIENTËVE FUNDORË”.**

Në mbështetje të nenit 16, pika 5 të Ligjit nr. 43/2015 “Për Sektorin e Energjisë Elektrike”, i ndryshuar, nenit 92 dhe 144 të Kodit të Procedurave Administrative në Republikën e Shqipërisë si dhe nenit 16 të “Rregullores së organizimit, funksionimit dhe procedurave të ERE-s”, miratuar me vendimin e bordit të ERE nr. 96, datë 17.06.2016, Bordi i Entit Rregullator të Energjisë (ERE), në mbledhjen e tij të datës 08.06.2020, mbasi shqyrtoi relacionin e përgatitur nga Drejtoritë Teknike, lidhur me rishikimin e vendimit nr. 73/2020, mbi miratimin e “Kontratës tip për shitblerjen e energjisë elektrike ndërmjet Shoqërisë së prodhimit të energjisë elektrike aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal /FSHU Sha për furnizimin e klientëve fundorë”,

Konstatoi se:

- Në datë 22.04.2020, Bordi i ERE me vendimin nr. 73, u shpreh në lidhje me miratimin e Kontratës Tip për shitblerjen e energjisë elektrike ndërmjet Shoqërisë së prodhimit të energjisë elektrike aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal, për furnizimin e klientëve fundorë.
- Vendimi i sipërcituar me qëllim njohjen me përmbajtjen përfundimtare të këtij dokumenti nga palët në kontratë, i është dërguar për dijeni këtyre të fundit nëpërmjet komunikimit me email të ERE në datë 01.05.2020.
- Në datë 07.05.2020 Shoqëria FSHU sha me shkresën nr.3882 Prot, ka paraqitur kërkesën për rishikimin e vendimit të ERE nr. 73/2020.
- Në nenin 16, pika 5, të ligjit nr. 43/2015, “Për sektorin e energjisë elektrike”, i ndryshuar, përcaktohet: ***Çdo palë e përfshirë në një procedurë mund t'i kërkojë ERE-s, brenda 7 ditëve kalendarike nga data e marrjes së vendimit lidhur me atë procedurë rishikimin e vendimit të bordit.***

- Në kuptim të parashikimeve të nenit 3, pika 7, gërma “a” dhe gërma “b”, të ligjit nr. 44/2015, “Kodi i procedurave administrative i Republikës së Shqipërisë” kërkuesi, Shoqëria FSHU Sha legjitimohet si palë në këtë procedurë për shkak të interesit të drejtëpërdrejtë në këtë vendimmarrje.
- Rezulton se kërkesa e Shoqërisë për rishikim të vendimit të ERE është paraqitur *brënda 7 ditëve kalendarike (data e depozitimit të kërkesës referuar marrjes dijeni është brënda këtij afati)*.
- Mjeti ligjor me anë të të cilit, njëra nga palët e përfshira në një procedurë të ndërmarrë nga ERE, mund t’i drejtohet ERE, është iniciativa ligjore për të kërkuar rishikim në rast se janë siguruar prova të reja, të tilla që mund t’a çojnë organin publik në marrjen e një vendimi të ndryshëm. Provat në kuptim të legjisllacionit sipërcituar por edhe parashikimeve të nenit 144 të Kodit të Procedurave Administrative në Republikën e Shqipërisë, duhet të jenë të tilla që të lidhen me zbulimin e rrethanave ose provave të reja me shkresë që kanë rëndësi për çështjen, të cilat nuk dihen dhe mund të dihen prej saj gjatë zhvillimit të procedurës administrative që ka çuar në nxjerrjen e aktit administrativ.
- FSHU Sha në kërkesën e saj për rishikim, shprehet se: parashikimet në nenin 9 zhdëmtimet /kompensimet, pika 3, nuk janë në favor të shoqërisë dhe vënë në vështirësi furnizimin me energji elektrike të klientëve fundorë të shoqërisë.
- Dispozitat e propozuara për ndryshim, në draftin për të cilin ERE ka filluar procedurën e me përmbajtjen e të cilit kërkuesi FSHU Sha është njohur gjatë fazës së konsultimeve, kanë parashikime të njëjta me ato në draftin përfundimtar të kontratës TIP të miratuar nga ERE.
- Shoqëria FSHU sha gjatë fazës së konsultimeve nuk ka paraqitur pretendime apo propozime për ndryshime në lidhje me përmbajtjen e dispozitave të nenit 9 të kësaj kontrate.
- Shoqëria FSHU Sha në propozimin e saj për ndryshime që në thelb konsistojnë në shfuqizimin e pikës 2 të nenit 9 dhe ndryshime të pikës 3 të nenit 9, nuk ka dhënë shpjegime, prova të reja të tilla që në kuptim të parashikimeve të nenit 144 të Kodit të Procedurave Administrative të lidhen me zbulimin e rrethanave ose provave të reja me shkresë që kanë rëndësi për çështjen, të cilat nuk dihen dhe mund të dihen prej saj gjatë zhvillimit të procedurës administrative që ka çuar në nxjerrjen e aktit administrativ.
- Në lidhje me këto propozime për ndryshime në kontratën e dakortësuar mes palëve gjatë fazës së shqyrtimit të draftit të kësaj kontrate, në cilësinë e palës në kontratë, ERE me shkresën nr.762/2 prot datë 14.05.2020, iu drejtua shoqërisë KESH Sha për marrjen e qëndrimit në lidhje me propozimet për ndryshime të bëra nga shoqëria FSHU Sh.a në kërkesën e saj drejtuar ERE-s për rishikim.
- Me të sajën nr.1499 prot datë 19.05.2020, shoqëria KESH Sh.a, iu përgjigj ERE duke i bërë me dije se: *Kërkesa për rishikim të vendimit të ERE nr.73/2020 ka për objekt një çështje të trajtuar gjatë diskutimeve të palëve për miratimin e kontratës për vitin 2020, diskutime mbi të cilat ERE vendosi për miratimin e kontratës në versionin që është në fuqi. Sa më sipër, vlerësojmë se nuk ndodhemi në kushtet e parashikimeve të pikës 5 të nenit 16 të ligjit 43/2015, të rishikuar.*
- Duke qënë se palët kanë qëndrime të ndryshme lidhur me këtë çështje (blerësi FSHU Sha dhe shitësi KESH Sha dhe duke marrë në konsideratë që të dy palët janë të ngarkuara me detyrimin e shërbimit publik, lind nevoja për më shumë kohë për të vlerësuar propozimin e kërkuesit.
- Për shkak të situatës së krijuar nga Covid-19 ka qënë i pamundur organizimi i një seance dëgjimore për të diskutuar mes palëve, përgjatë kësaj periudhe kohe.

- Për të analizuar të gjithë elementët e cituar më sipër, në mënyrë që të jepet një gjykim dhe argumentim i drejtë dhe i saktë i problematikës së sipërcituar, në kushtet e krijuara në situatën aktuale, për shkak të masave kufizuese të ndërmarra nga Qeveria Shqipëtare për shmangien e përhapjes së epidemisë së shkaktuar nga virusi Covid 19, është e nevojshme zgjatja e afatit kohor të shqyrtimit të kësaj kërkesë nga ERE, në mënyrë që të vlerësohet sa propozuar.

Për gjithë sa më sipër cituar, bordi i ERE-s,

Vendosi:

1. Zgjatjen me 30 ditë të procedurës administrative për shqyrtimin e kërkesës së shoqërisë FSHU sha për rishikimin e vendimit të ERE Nr. 73/2020 mbi miratimin e “Kontratës tip për shitblerjen e energjisë elektrike ndërmjet Shoqërisë së prodhimit të energjisë elektrike aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal /FSHU Sha për furnizimin e klientëve fundorë, si të pa mbështetur në prova të reja të tilla që mund të çojnë Bordin e Entit Rregullator të Energjisë (ERE) në rishikimin e tij.
2. Drejtoria e Çështjeve Ligjore, të njoftojë kërkuuesin për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI I ERE
Petrit AHMETI